

Табасаранский

1 Сифте Гаф айи, Гаф Аллагъдихъ хъайи, Гаф Аллагъ вуйи. 2 Думу сифте Аллагъдихъ хъайи. 3 Вари Гъадгъуланмина гъабхъну ва, Думу дарди, арайиз дуфнайибдик, фукIара арайиз гъафундар. 4 Уьмур Гъадгъаъ а, ва гъадму уьмур инсаниятдиз акв ву. 5 Аквну мучIушнаъ акв тувру ва мучIушнахъан акв ккабгъуз шулдар.

6 Аллагъди Ягъ'я кIуру ччвур али адми гъаъру. 7 Думу Акв улупуз, Акв Месигъ вуди, Гъадгъулантина вари хъугъбан бадали, гъаур вуйи. 8 Думу учв Акв дайи, амма Аквнан гъакънаан шагъидвал апIуз гъаънайир вуйи. 9 Гъакъикъи Аквну му дюн'яйиз гъюру гъарсар касдиз аьгъювалар тувру. 10 Думу, Чав арайиз гъабхи му дюн'яйиз гъафну, хъа му дюн'яйиндариз Думу къабул гъахъундар. 11 Думу жвувандарихъна гъафну, хъа жвувандари Думу гъясбикк гъапIундар. 12 Учв къабул гъапIдариз ва Чан ччвур дибисну хъугъдариз Дугъу дурар Аллагъдин веледар хъувал багъиш гъапIну. 13 Дурар инсанарин ниятариинди, ясана адмийириз ккун гъабшиган бабкан шлудар дар. Думу веледар Аллагъдихъан ву.

14 Гаф Инсандиз илтIикIуру ва ухъухъди яшамиш шулу. Ухъуз Дугъан Аллагъвалин зурбавал ва къувват гъябкъюнхъуз, масанвали ва гъякъвали ацIнайидар – Дугъаз дурар, Адашдихъ хъайи сар Бай вуди хъпаз гъурукъну. 15 Дугъкан адмийириз Ягъ'яйи хабар дебккру: «Магъа Думу узу учвуз кIурайир: „Думу, йиз къяляхъди Гъюрайир, узутIан заан ву, гъаз гъапиш Думу узу хъайиз айир ву“». 16 Дугъан абцIнайи ужувлиинди ухъуз ужувлахъди уж'вал гъабхъунхъуз. 17 Аллагъди ухъуз Къанун Мусайилантина тувну, хъа ужувларна гъякъвал Месигъ Исайиланмина гъафидар ву.